



Broj: 01,02,03,03/11-05-1-1331/25
Datum: 1. 10. 2025. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 02-10-2025			
Organizaciona jedinica	Klasifikaciona oznaka	Redni broj	Broj priloga

2

KOLEGIJ DOMA NARODA PSBiH
KOLEGIJ PREDSTAVNIČKOG DOMA PSBiH
KOLEGIJ SEKRETARIJATA PSBiH

Predmet: Izvještaj sa službenog putovanja delegacije Parlamentarne skupštine BiH na Međuparlamentarnu konferenciju o zajedničkoj vanjskoj, sigurnosnoj i odbrambenoj politici EU, Kopenhagen (25–28. august 2025)

Prvi zamjenik predsjedavajućeg Doma naroda Parlamentarne skupštine BiH Kemal Ademović učestvovao je na Međuparlamentarnoj konferenciji o Zajedničkoj vanjskoj i sigurnosnoj politici Evropske unije (CFSP) i Zajedničkoj sigurnosnoj i odbrambenoj politici Evropske unije (CSDP), održanoj od 26. do 28. augusta u Kopenhagenu. Konferenciju su zajednički organizirali Parlament Kraljevine Danske i Evropski parlament.

Skup je okupio visoke zvaničnike nacionalnih parlamenata država članica Evropske unije, partnere iz zemalja koje nisu članice, te brojne evropske i međunarodne predstavnike. Tokom trodnevnog programa vođene su rasprave o ključnim pitanjima vanjske politike i sigurnosti, s posebnim naglaskom na prioritete i strategije Zajedničke vanjske i sigurnosne politike Evropske unije (CFSP) i Zajedničke sigurnosne i odbrambene politike Evropske unije (CSDP), te podršku Ukrajini u odbrani slobode, demokratije i suvereniteta.

Na Konferenciji su razmatrana pitanja jačanja saradnje između Evropske unije i NATO-a u oblasti odbrane i globalne sigurnosti, stanja i perspektiva transatlantskih odnosa, migracija i uloge EU na Bliskom istoku. Također je bilo riječi o proširenju Evropske unije kao strateškoj investiciji u sigurnost, te o otpornosti društva, zaštiti kritične infrastrukture, energetskim i klimatskim izazovima.

U okviru plenarne sesije „*Strateški trenutak Evrope: Unapređenje komplementarnosti EU i NATO-a u oblasti odbrane, odvratanja i globalnih prijetnji*“ istaknuto je da se geopolitička situacija u Evropi brzo mijenja, uz rastuće tenzije u Arktičkom regionu, složenu i sve veću ilegalnu migraciju, hibridne ratove i invaziju u punom obimu na Ukrajinu. Naglašeno je da sigurnost evropskih građana osiguravaju države članice, Evropska unija i NATO, pri čemu

partnerstvo EU i NATO-a jača zajedničke kapacitete, sa 74 zajednička projekta i prostorom za daljnje unapređenje saradnje.

Kemal Ademović aktivno je učestvovao i u radu sesije posvećene migracijama pod nazivom „*Rješavanje pitanja migracija: Unapređenje saradnje s trećim zemljama*“. Tokom rasprave istaknuto je da neregularne migracije predstavljaju ozbiljan izazov za sigurnost, koheziju i prosperitet Evrope. Posebno je naglašena važnost sprečavanja i suzbijanja industrije krijumčarenja, te razvijanja obostrano korisnih strateških partnerstava s partnerskim zemljama duž migracijskih ruta, radi postizanja održivih rješenja, jačanja vanjskih granica EU i osiguravanja povratka državljana trećih zemalja koji nezakonito borave u Evropskoj uniji.

Tokom diskusije razmatrana su pitanja: kako Evropska unija može unaprijediti strateška partnerstva s trećim zemljama, koje su ključne lekcije iz postojećih partnerstava, koji su koraci potrebni za poboljšanje zaštite vanjskih granica, te da li postojeći alati omogućavaju efikasan povratak državljana trećih zemalja bez zakonitog boravka u EU.

Zaključci plenarnih i tematskih sesija doprinijeli su sadržaju bilateralnih razgovora gospodina Ademovića. Posebno je naglašeno kako primjena strateških smjernica EU i jačanje saradnje s NATO-om direktno utiču na sigurnosne izazove u regionu, uključujući migracije i prekogranični kriminal.

Prvi zamjenik predsjedavajućeg Doma naroda Kemal Ademović sastao se s predsjednikom Parlamenta Kraljevine Danske Sørenom Gade Jensenom. Tokom sastanka predstavio je aktuelne političke i sigurnosne izazove Bosne i Hercegovine i naglasio značaj ubrzanja euroatlantskih integracija. Posebno je istaknuo važnost aktiviranja Sporazuma s Agencijom FRONTEX za zaštitu istočne granice Bosne i Hercegovine i efikasnu kontrolu prekograničnog kriminala i migracija. Također je izrazio zahvalnost na ponovnom otvaranju Ambasade Kraljevine Danske u Sarajevu i istaknuo značaj postizanja sporazuma o dvojnomoj državljanstvu radi olakšavanja boravka bosanskohercegovačkih državljana u Danskoj.

Predsjednik danskog parlamenta naglasio je da je proces proširenja Evropske unije među ključnim prioritetima danskog predsjedavanja Vijećem EU, te je potvrdio opredijeljenost Danske za aktivnu podršku Bosni i Hercegovini na njenom putu ka EU i NATO-u.

Prvi zamjenik predsjedavajućeg Doma naroda Parlamentarne skupštine BiH Kemal Ademović uputio je poziv predsjedniku Parlamenta Kraljevine Danske Sørenu Gadeu Jensenu za službenu posjetu Bosni i Hercegovini.

Kemal Ademović sastao se i sa zamjenicom izvršnog direktora Agencije za evropsku graničnu i obalnu stražu (FRONTEX) Aijom Kalnajom. Ademović se interesirao za napredak u provođenju Sporazuma o operativnim aktivnostima između Evropske unije i Bosne i Hercegovine. Gospođa Kalnaja izrazila je punu spremnost FRONTEX-a za operacionalizaciju Sporazuma i početak njegove primjene do kraja godine. Naglasila je da će se u skorije vrijeme službenici Evropske unije nalaziti na određenim graničnim prijelazima Bosne i Hercegovine, pod komandom Granične policije BiH, te da će pružati podršku kroz

tehničku i kadrovsku pomoć s ciljem efikasnijeg upravljanja granicom, smanjenja broja ilegalnih migracija i sprečavanja prekograničnog kriminala.

Učešće prvog zamjenika predsjedavajućeg Doma naroda Kemala Ademovića na ovom značajnom međunarodnom skupu omogućilo je razmjenu mišljenja s evropskim i međunarodnim kolegama, te doprinijelo jačanju uloge Bosne i Hercegovine u procesima saradnje u okviru Zajedničke vanjske i sigurnosne politike i Zajedničke sigurnosne i odbrambene politike Evropske unije.

Izvještaj pripremila

Amila Kličić

Stručna savjetnica – prevoditeljica za
engleski jezik

Dostaviti:

- naslovu
- Komisiji za vanjske poslove PDPSBiH
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za odnose s javnošću
- Sektoru za međunarodne odnose i protokol
- a/a
- kopija: Ministarstvo vanjskih poslova BiH